

Morning Dogri (NSD) National News Bulletin 25-05-2024

आकाशवाणी

- 6 राज्यें ते दऊं केन्द्र शासत प्रदेशों दे 58 संसदीय हल्के च लोकसभा चुनावें दे 6में गेड़ लेई वोट पाने दा कम्म जारी ऐ।
- ओडिशा विधानसभा दे 42 हल्के लेई मतदान जारी ऐ।
- लोकसभा चुनावें दे 7में ते खीरले गेड़ लेई प्रचार च आई तेजी।
- भारती मौसम विभाग नै चक्रवाती तूफान "रेमल" दे प्रभाव करी पच्छिम बंगाल ते उत्तरी ओडिशा दे कंडे आले इलाके च भारी बरखा होने दी भविष्यवाणी कीती ऐ।
- भारत नै दक्खन कोरिया च तीरंदाजी विश्व कप दे स्टेज-2 दे मकाबले च कंपाउंड महिला टीम नै सुन्ने दा तगमा हासल कीता।
- बैडमिंटन च ओलंपिक मैडल विजेता पी.वी.सिंधु कुलालमपुर च मलेशिया मास्टर्स च महिला सिंगल्स दे सैमीफाइनल च दुनिया दी 20में नंबर दी खडारी कन्नै मकाबला होग।

<><><><><><>

6th Phase

लोकसभा चुनावें दे 6में गेड़ लेई अज्ज वोट पाने दा कम्म शुरू होई गेदा ऐ। इस गेड़ च 58 संसदीय हल्के च वोट पाए जा'रदे न। इस गेड़ च बिहार दी 8, हरियाणा दी सब्बै 10, झारखंड दी 4, दिल्ली दी सब्बै 7, ओडिशा दी 6, उत्तर प्रदेश दी 14, पच्छिम बंगाल दी 8 ते जम्मू कश्मीर दी इक सीट पर मतदान होआ'रदा ऐ। मतदान बडलै 7 बजे शुरू होई गेआ हा। बीजेपी दे बड्डे नेता धमेन्द्र प्रधान, मेनका गांधी, मनोहर लाल, संबित पात्रा, बांसुरी स्वराज ते मनोज तिवारी ते कांग्रेस नेता दीपेन्द्र सिंह हुड्डा, कुमारी शैलजा, राज बब्बर ते कनैया कुमार सनें प्रमुख नेताएं दे सियासी भविष्य दा फैसला होग। समाजवादी पार्टी दे नेता धमेन्द्र यादव ते पीडीपी प्रमुख महबूबा मुफ्ती दी बी सियासी भविष्य दा फैसला अज्ज ईवीएम च बंद होई जाग।

इस गेड़ च इक्क लक्ख 14 जहार मतदान केन्द्रें पर 11 करोड़ 13 लक्ख थमां मते मतदाता अपने वोट पाने दे अधिकार दा इस्तेमाल करगंन। चुनां आयोग नै दिल्ली, गुरुग्राम ते फरीदाबाद जनेह शैहरी इलाकें दे वोटरें गी अपने वोट पाने दे अधिकार दा इस्तेमाल करने दा चेची गुजारिश कीती ऐ।

<><><><><><>

Odisha

ओडिशा असेंबली दे 42 संसदीय हल्के च वोटिंग दा कम्म जारी ऐ। मतदान बडलै 7 बजे संबलपुर, क्यूंझार, देनकनाल, कटक, भुवनेश्वर ते पुरी लोकसभा सीटें लेई शुरू होई गेआ ऐ। मतदान संजा 6 बजे सम्पन्न होई जाग लेकन केई संवेदनशील इलाकें च मतदान थोड़ा तौले गै सम्पन्न होई जाग।

<><><><><><>

7th Phase

लोकसभा दे 7में ते खीरले गेड़ लेई प्रचार च तेजी आई गई ऐ। जेहदे चलदे बक्ख-बक्ख सियासी पार्टिएं दे बड्डे नेता मतदाताएं गी अपनी बक्खी करने दी कोशश करा'रदे न। चुनाएं दे 7में गेड़ च 7 राज्यें ते इक्क केन्द्र शासत प्रदेश च लोकसभा दिएं 57 सीटें पर मतदान कीता जाग। बीजेपी दे वरिष्ठ नेता ते प्रधानमंत्री नरेन्द्र मोदी होर हिमाचल प्रदेश च प्रचार करा'रदे न।

<><><><><><>

PM Rally

बीजेपी दे बड्डे नेता ते प्रधानमंत्री नरेन्द्र मोदी होर अज्ज बिहार दे दौरे पर रौंहगन, ओह पटना, रोहतसा ते बक्सर जिलें च त्रै जलसभा करगंन। श्री मोदी पटना जिलें च विक्रम थमां अभियान शुरू करगंन ते पाटलीपुत्र संसदीय सीट लेई बीजेपी दे मेदवार समर्थन च प्रचार करगंन।

प्रधानमंत्री हुंदी दूर चुनावी रैली रोहतास जिले दे काराकाट लोकसभा क्षेत्र च ओल्ड जी.टी. रोड दे नेडे सुअरा हवाई अड्डे मैदान च होग। श्री मोदी होरें एहदे मगरा बक्सर संसदीय हल्के च अहिरौली च जनसभा करगंन। पाटलीपुत्र, काराकाट ते बक्सर निर्वाचन क्षेत्र च लोकसभा चुनाएं दे 7में ते खीरले गेड च पैहली जून गी वोट पाए जाने न।

<><><><><><><><>

ICG Cyclone

भारतीय तटरक्षक बल नै बंगाल दी मध्य खाड़ी थमां शुरू होने आले चक्रवाती तूफान "रेमल" दे चलदे समुंद्र च जान ते माल दा घट्टोघट्ट नुकसान जकीनी बनाने लेई व्यापक तैआरी दे उपाय शुरू कीते न। आईसीजी नै चक्रवाती तूफान थमां पैदा होने आले नुकसान गी घट्ट करने लेई सरबंधत राज्य प्रशासनें ते हितधारकें कन्नै तालमेल बनाइयै जतन कीते न। हाल्दिया ते पैराडिप च आईसीजी दे रिमोट ओपरेटिंग स्टेशन नियमित ते बहुभाषी होई फ्रिक्वेंसी अलर्ट प्रसारित करा'रदे न। जिंदे च ट्रांसिट मर्चेट गी जरूरी सावधानी बरतने दी सलाह दित्ती गेई ऐ। आईसीजी दे जहाज ते विमान इस चक्रवाती तूफान दे अनुमानित रस्ते उप्पर पूरी निगरानी करा'रदे न तां जे समें उप्पर मदद उपलब्ध करोआई जाई सकै।

<><><><><><><><>

Archery Gold

दक्खन कोरिया दे सेचे ओन च तीरंदाजी विश्व कप दे स्टेज 2 च कंपाउंड महिला टीम इवेंट च भारत नै सुन्ने दा तगमा हासल कीता ऐ। ज्योथि सुरेखा वेनम, पुरनीत कौर ते अदिति स्वामी दी त्रिगड़ी नै फाइनल मकाबले च तुर्की दे खलाफ स्ट्राइक करियै सुन्ने दा तगमा हासल कीता। विश्व नंबर 1 भारतीय कंपाउंड महिला टीम नै पैहले छोर थमां गे तुर्की दी हेजल बरुण, आमसे बेरा सुजर ते बेगम युवा उप्पर हावी होइयै सुन्ने दे तगमे उप्पर मोहल लाई दित्ती।

<><><><><><><><>

Badminton

दरुं बारी ओलंपिक मैडल हासल करने आली पी.वी.सिंधु दा मकाबला अज्ज कुलालमपुर च मलेशिया मास्टर्स च महिला सिंगल्स सैमीफाइनल च विश्व दी 20 नंबर दी थाईलैंड दी खडारी बूसानन कन्नै होग। एस शटलर नै कल क्वार्टर फाइनल च चीन दे हाल यू गी हराया हा। हालांके अशमीता चलिहा होर महिला एकल क्वार्टर फाइनल च ची नदी झांग यी थमां हारी गेइयां हियां।

<><><><><><><><>

IPL

आईपीएल क्रिकेट च सनराईजर्स हैदराबाद नै कल चेन्नई दे एम.ए.चिंदबरम स्टेडियम च खेड्डे गेदे दुए क्वालीफायर मैच च राजस्थान रॉयल्स गी 36 रंजें कन्नै हराई दित्ता। जित्त लेई 176 रंजें दा पिच्छा करदे होई राजस्थान रॉयल्स नै तैहशुदा 20 ओवरें च कुल 139 रंज गै बनाई सकी ते ओह्दे 7 खडारी आउट होए दे हे। एह्दे थमां पैहले सनराईजर्स हैदराबाद नै 20 ओवरें च 9 विकटें दे नुक्सान पर 175 रंज बनाए। हैनरिच क्लासन नै 34 गेंदें च 50 ते ध्रुव जुरेल नै 35 गेंदें च नाबाद 56 रंजें दी पारी लेई खेड्डी। सनराईजर्स हैदराबाद लेई शाहबाज अहमद नै त्रै विकटां, जिसलै के ट्रेन्ट बोल्ट ते आवेश खान नै राजस्थान रॉयल्स लेई 3-3 विकटां हासल कीतियां। हुन सनराईजर्स हैदराबाद तारें चेन्नई दे एम.ए. चिंदबरम स्टेडियम च कोलकाता नाईट राईडर्स दा सामना करोग। एह्दे थमां पैहले कोलकाता नाईट राईडर्स नै सनराईजर्स हैदराबाद गी पैहले क्वालीफायर मैच च हराया हा।

<><><><><><><><>

Cannes Award

“Sunflowers were the first one to know” फिल्म, फिल्म ते टैलीवीजन इंस्टीच्यूट ऑफ इंडिया दे विद्यार्थी चिदानंद एस.नायक ते उंदी टीम गी 77में कैनर्स फिल्म उत्सव च “ La Cinef ” अवार्ड हासल होआ ऐ। विजेता दी अधिकारिक घोषणा कल महोत्सव च कीती गई। फिल्म दा निर्देशन चिदानंद एस.नायक होरें कीता ऐ, शूट सूरज ठाकुर होरें, अडिटिंग मनोज वी. होरें ते साउंड अभिशोक कदम होरें कीता ऐ।

सूचना ते प्रसारण मंत्रालय नै आखेआ ऐ जे भारतीय सिनेमा लेई एह इक ऐतिहासिक पल ऐ एफटीआईआई नै पिछले किश ब'रें च कैनर्स च खरा प्रदर्शन कीता ऐ। 77में कैनर्स फिल्म उत्सव च भारत थमां बक्ख-बक्ख श्रेणिं च मती सारी प्रविश्टियां आइयां हिआं। एफटीआईआई दे मते सारे साबका छात्र जिआं पायल कपाडिया, माइसम अली, संतोष सिवन, चिदानंद एस. नायक ते उंदी टीम गी इस ब'रे कैनर्स फिल्म उत्सव च मान्यता हासल होई।

<><><><><><>

Supreme Court

सर्वोच्च न्यायलय नै अज्ज लोकसभा चुनां दे दरान अपनी वेबसाइट उप्पर मतदान केन्द्र-वार मतदान प्रतिशत अपलोड करने दी याचिका उप्पर चुनां आयोग गी निर्देश जारी करने लेई इंकार करी दित्ता ऐ। न्यायलय नै चुनावी प्रक्रिया दे बिच्च दखल अंदाजी आला रवैया अपनाने दा समर्थन नेई कीता ऐ। न्यायधीश दीपांकर दत्ता ते सतीश चन्द्र शर्मा दी पीठ नै याचिका पर आखेआ ऐ जे सुनवाई लोकसभा चुनां दे परैंत कीती जाग।

<><><><><><>

PM-Condolence

प्रधानमंत्री नरेन्द्र मोदी होरें समाज सेवी नबम अतुम हुंदी मौत उप्पर दुख प्रगट कीता ऐ। अपने इक सनेह च श्री मोदी होरें आखेआ जे नबम अतुम होरें अरुणाचल प्रदेश दी अनोखी सांस्कृतिक पंछान गी लोकप्रिय बनाने दी दिशा च अपना जीवन समर्पित कीता ऐ ते अरुणाचल प्रदेश दी संस्कृति ते लोक आस्था गी मजबूत कीता ऐ। नबम अतुम इक समाज सेवी ते अरुणाचल प्रदेश दी लोक सेवा आयोग दे साबका चेयरमैन हे।

<><><><><><>